

Du ju spiek Englisch?

Günter Mannweiler

Viel Pälzer hann, des is bekannt,
ehr Glick gesucht im ferne Land.
Sinn niwwer no Amerika
un hann dort Worzele geschlaa.
Un schnell, wie Pälzer halt mol sinn,
do hatten die die Sprach dort drin.

Jetzt schicken die vun driwwer als
e Haufe Ausdrick in die Palz.
Geh nor mol onne in die Stadt
un heer der aa es Pälzer Platt:

Die Blumme Gäbt's im Flowershop,
de Hairstyler schafft dir am Kobb.
Im Drugstore Gäbt's so Beautysache,
die wo die Leit soll'n schääner mache.
De Fashionstore der sorgt dafür,
dass de Dresscode stimmt bei dir.
Im Fitness-Studio Gäbt's, na klar,
e Sixpack, wo de Schmerbauch war.

Die City is die InneStadt,
wo's Coffeeshops un Diners hat.
Mer nämmt e Drink gege de Dorscht
un saat Hot Dog zum Weck mit Worscht.
Beim Ochsewirt Gäbt's sunndags Brunch
un Mittagesse hääßt jetzt Lunch.
Un wer noch owends Hunger hat,
den machen Chicken-Nuggets satt.
Salatsoß mer als Dressing kennt
un Obstsaft mer jetzt Smoothie nennt.

Wer Power hat, steht gut im Saft,
wer jobbt, net regelmäßig schafft.
Wer happy is, der fräät sich als,
wer down is, hot Maleer om Hals.
Wer high erumlaaft, hat gesoff,
wer 'Hi' saat, hot Bekannte 'troff.
Mer werd gelift, gestylt, gedresst,
mer is relaxed oder gestresst.



So sprecht mer heit do in de Stadt.
Mer heert's uff Schritt un Tritt.
So klingt heit unser Pälzer Platt.
Aa, wer net will, muss mit,
sunscht is er nimmi up to date.
Doch bass nor uff, sunscht is' zu spät:
Dann sprechen mer am schääne Daa
wie driwwe in Amerika!

